

^a
Quando Faventini juverunt Ubertinum de Tebaldo contra
Petrum Traversarium.

CAP. LXXXX.

Discordia nata non modica inter Petrum Traversarium et Ubertinum de Tebaldo, occasione hereditatis Iohannis Ducis jam defuncti [A], generi predicti Petri Traversarii, Faventini in partem cessere Ubertini. Anno itaque Domini MCLXXXI, Faventini, ducentes secum Imolenses, ad servitium Ubertini militaverunt in planum Ravennae, capientes et destruens Sanctum Petrum ad vincula [B] et cetera loca Iohannis Ducis usque ad Urbem. Castrum vero Curtinae igne hostiliter combusserunt.

De prima destructione Bagnacaballi.

CAP. LXXXXI.

Sub anno Domini incarnationis MCLXXXI, Bagnacaballenses, more arundineo in partem dexteram sinistramque saepissime declinantes, cives urbis Ravennae atque Faventiae offendere vicissim non verebantur. Ravennates igitur atque Faventini, finem tantae nequitiae [a] imponere volentes, amicitia inter eos jam juramento firmata, burgum Bagnacaballi penitus destruxerunt, omnibus nobilibus utrique ^{communis} [b] divisus aequaliter. Anno eodem, Faventini, in veritate scientes quod Ravennates predictum burgum reaedificare volebant, tunc et ipsi reaedificari permiserunt, recipientes a Comitibus bizantium [c]. *unum annuatim*

De admiranda translatione Constantinopolitani imperii.

CAP. LXXXXII.

Quamvis aliquantulum a proposito nostro videamur facere digressionem, tamen, quia [d] credimus posteris profuturum ad utilitatem legentium ac audientium, quae-

[a] tantae nequitiae. Sic C. V. In C. M. deest, nequitiae, quare supplendum credidit Cl. Mitt., tantae molestiae. — [b] utrique communitati. Sic lego. Cl. Mitt. et C. V. habent, utrinque. Contati habere videtur C. M. clarissimo Mittarellio; mihi vero legi posse videtur Communitati. An legendum utriusque comunis? — [c] bizantium, C. M., bisantium, C. V. — [d] tamen quia. Sic lego; tum quia, C. V.; dunque, Cl. Mitt.

[A] Ioannes Dux, gener Petri Traversarii, vita functus est anno MCLXXVIII., (Vid. *Annal. Camaldul.* Cl. Mittarellii, Tom. IV, pag. 78.) Traversaria, unde Petrus denominabatur, locus erat ad dexteram fluminis Anemonis, decem circiter milliariis ab urbe Ravenna. Alius tamen locus huiusce nominis apud Blondum invenitur, qui vicus erat ad Anemonis in Padusam ingressum.

[B] Castrum Sancti Petri ad Vincula in agro Ravennate erat; ibique olim erat Abbatia Ord. Camaldul. appellata Sanctus Petrus ad Vincula ex Cl. Mittarellio. Nominatur in charta anni 1194 (H 3789, et 1357, E 1243, Archiv. Archiep. Ravenn.), ubi dicitur spectare ad dioecesim Ravennatem.